



**Komunikadu Imprensa**  
**20 Feveiru 2023**

**JSMP no Defensoria Públiku fahe informasaun ba estrutura suku no comunidade iha Suku Lauala kona-ba Justisa Formál**  
**Estrutura suku apresia ho prezensa Defensora Públiku**

Iha 16 Feveiru 2023, JSMP hamutuk ho Defensoria Públiku (DP) fahe informasaun ba estrutura suku no comunidade balun iha Suku Lauala, Postu Administrativu Ermera, Munisípiu Ermera kona-ba Asesu ba Justisa Formál liuliu Papél Defensória Públiku (DP) iha jerál no knaar DP tuir Lei Kontra Violénsia Doméstika (LKVD), Violénsia Bazeia ba Jéneru no oinsa refere kazu violénsia bazeia ba jéneru iha justisa formál.

Objetivu husi treinamentu ne'e atu habelar informasaun no hasa'e koñesimentu membru estrutura suku no comunidade sira nian kona-ba asesu ba justisa formál liuliu kona-ba papél Defensoria Públiku iha jerál no tuir LKVD, Violénsia Bazeia ba Jéneru no mós oinsa refere kazu sira violénsia bazeia ba jéneru iha justisa formál. Alende ne'e, iha tempu hanesan estrutura suku no comunidade sira bele hato'o diretamente hanoin ka preokupasaun liga ho serbisu defensoria públiku nian no hetan esplikasaun diretamente mós husi defensór públiku ba iha sira nia preokupasaun ne'e.

Treinamentu ne'e partisipa husi xefe aldeia, delegada feto, joven feto no joven mane no ema ho defisiénsia. Totál partisipante sira hamutuk ema na'in 20 kompostu husi feto 10 no mane 10.

“Estrutura suku no comunidade sira presiza tebes informasaun kona-ba oinsa asesu ba justisa formál inklui oinsa refere kazu sira ne'ebé feto ho labarik sira hasoru, nune'e sira bele iha koñesimentu kona-ba lala'ok justisa formál nian. Enkuantu, prezensa defensór públiku iha JSMP ninia atividade ne'e nu'udar dalan ida atu hakbesik autór tribunál (defensór) ho comunidade sira tanba liuhusi atividade ne'e, partisipante sira bele rona diretamente esplikasaun kona-ba papél defensoria públiku iha jerál no papél tuir LKVD no mós hetan resposta diretamente husi defensór públiku ba sira nia hanoin ka preokupasaun ne'ebé hato'o iha sesaun fahe informasaun ne'e,” dehan Diretora Ezekutiva JSMP, Sra. Ana Paula Marçal.

Iha sesaun fahe informasaun, Dra. Marcia Sarmiento nu'udar defensora iha Defensoria Públiku Dili no mós asumi kargu nu'udar Inspetora iha Defensoria Públiku, esplika ho klean

Rua Beco Lakateu, Aldeia Manu fuik,  
Suku Colmera, Administrativu Vera Cruz  
Dili Timor Leste  
PoBox: 275  
Telefone: 3323883 | 77040735

[www.jsmp.tl](http://www.jsmp.tl)

[info@jsmp.tl](mailto:info@jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

kona-ba papél DP iha assisténsia legál ba ema kbiit la'ek ho gratuita. Alende ne'e, esplika mós kona-ba atuasaun DP tuir Artigu 25 LKVD iha kazu sira violénsia hasoru fetu no labarik sira. Relasiona ho assisténsia legál ba ema kbiit la'ek ho gratuita refere, defensora ne'e sujere ba iha partisipante sira atu hato'o keixa ba iha Instituisaun Defensória Públiku bainhira hetan no hatene defensor ida husu osan ba nia kliente. Alende ne'e, Dra. ne'e apela ba partisipante sira katak odamatan Defensoria Públiku nakloke no prontu ajuda bainhira comunidade sira presiza informasaun ka hasoru kazu ruma.

Depoisde rona esplikaun ne'e, partisipante sira balun hato'o sira nia esperénsia kona-ba kazu ne'ebé sira decide atu rezolve de'it iha suku no lakohi atu lori ba justisa formál tanba sira laiha kbiit ekonomia. Tuir sira nia hanoin, justisa formal ne'e tenke selu tantu defensoria públiku. Preokupasaun seluk ne'ebé hato'o husu partisipante sira mak kona-ba prosesu kazu sira iha tribunál ne'ebé han tempu kleur.

Antes hato'o preokupasaun-sira ne'e, partisipante sira hato'o agradesimentu ba iha JSMP tanba bele organiza treinamentu ne'e no apresia ho prezensa defensora ne'ebé bele to'o rasik ba iha sira nia suku hodi esplika ho klean kona-ba DP nia serbisu sira. Sira hatutan katak liuhusi esplikaun ne'e, sira hatene ona papél husi defensoria públiku no rekomenda atu kontinua fahe informasaun kona-ba papél DP no bele serbisu to'o iha baze.

Relasiona ho preokupasaun sira no rekomendasaun atu kontinua habelar informasaun no serbisu to'o baze, defensora ne'e hatan katak dadauk ne'e Defensoria Públiku sei sub tutela administrativa financeira no patrimonial iha Ministériu Justisa, nune'e laiha possibilidade ba to'o baze hodi halo sosializasaun, maibé karik comunidade sira balun hasoru problema no hakat to'o iha Defensoria Públiku hodi husu assisténsia, defensor sira laiha razaun atu rekuza no prontu atu fó assisténsia ba comunidade ne'ebé presiza. Kestaun kona-ba prosesu kazu kleur iha tribunál, defensora no Diretora JSMP, konsidera ida ne'e nu'udar problema ida no presiza atu rezolve no esplika mós kona-ba situasaun iha tribunál sira ne'ebé kontribui ba iha adiamentu hodi kazu sira kleur tebes iha prosesu justisa formál. Alende ne'e, esplika mós kona-ba importansia kooperasaun entre parte intervenente sira ho justisa formál atu hamenus adiamentu ba kazu sira.

Kontinua iha sesaun fahe informasaun, fasilitadór sira husi JSMP esplika kona-ba oinsa asesu ba justisa formál, violénsia bazeia ba jeneru no serbisu rede referál nian ba iha kazu sira violénsia bazeia ba jeneru.

Depoisde rona esplikaun iha sesaun daruak ne'e, partisipante sira hato'o preokupasaun kona-ba inan-aman ne'ebé fahe malu no abandona oan sira. Preokupasaun seluk kona-ba feen-la'en hola malu ho idade ki'ik, mosu violénsia entre sira vítima rasik lakohi atu keixa maibé ema seluk fali mak ba denúnsia.

Hatan ba preokupasaun kona-ba inan-aman abandona oan sira, JSMP esplika obrigasaun inana-aman tuir lei atu fó alimentasaun ba sira nia oan to'o idade adultu. Iha parte ne'e, JSMP mós rekomenda ba iha partisipante sira atu hato'o ba iha prokuradór bainhira hatene iha oan balun ne'ebé hetan abandona husi inan ka aman. Bele mós ba iha JSMP ka ALFeLa, no JSMP sei ajuda fasilita oan sira ba iha prokuradór hodi prosesa "regulasaun podér paternál" ba iha tribunál nune'e labarik sira bele hetan sira nia direitu ba alimentasaun.

Kestaun kona-ba kazu violénsia doméstika ne'ebé ema seluk mak apresenta denuncia maibé vítima rasik lakohi atu keixa, JSMP esplika katak tuir loloos nu'udar vítima di'ak atu keixa hodi nune'e arguidu la repere ninia hahalok iha futuru. Mezmu nune'e, ema seluk ne'ebé hetan ka rona bele apresenta denúnsia. Funsionáriu públiku, jestór públiku ka autóridade públiku iha obrigasaun ba partisipasaun no bainhira la halo partisipasaun, sira komete krime ho naran la partisipasaun.

Antes ne'e, iha sesaun primeiru, Diretora Ezekutiva JSMP, Sra. Ana Paula Marçal, iha ninia intervensaun agredese tebes ba xefe suku no estrutura suku ne'ebé simu ona JSMP atu bele realiza atividade refere. Nia hatutan katak JSMP no Defensoria Públiku la'os mai atu hanorin estrututa suku no comunidade sira maibé mai atu fahe informasaun kona-ba lala'ok justisa formál no iha tempu hanesan hetan mós informasaun husi partisipante sira. Diretora mós husu ba partisipante sira atu uza oportunidade ne'e ho di'ak hodi husu no hato'o preokupasaun sira relasiona ho serbisu defensoria públiku ka serbisu tribunál nian ba iha defensora ne'ebé marka prezensa iha atividade refere. Diretora espera, informasaun sira ne'ebé hetan bele habelar ba comunidade sira ne'ebé la hetan oportunidade atu partisipa iha treinamentu ne'e.

Entetantu, Dra. Marcia Sarmento, iha ninia intervensaun, hateten katak nia sente kontente tebes atu fahe informasaun kona-ba knaar defensoria públiku nian ba iha comunidade sira, tanba durante ne'e comunidade barak mak la hatene kona-ba kna'ar husi DP. Dra. hatutan katak maski ema balun hatene katak DP ninia knaar mak atu reprezenta arguidu iha tribunál, maibé barak ladun hatene kona-ba papél DP tuir artigu 25 LKVD kona-ba asisténsia legál ne'ebé rekere Defensoria Públiku ka advogadu atu fó akonselamentu legál ba vítima sira kona-ba oinsa vítima sira prosesa sira nia kazu tuir dalan justisa formál.

Iha parte seluk, Xefe Suku Lauala, Sr. Carlos M. Babo, antes loke treinamentu ne'e, hato'o agradesimentu ba JSMP no defensoria públiku tanba to'o iha sira nia suku hodi fahe informasaun kona-ba asuntu justisa. Ho nune'e, xefe suku ne'e husu ba estrutura suku sira no partisipante hotu atu rona no fó atensaun maximu no husu klarifikasaun karik iha dúvida ruma, nune'e bele hetan esplikasaun hodi bele komprende ho di'ak no bele fahe tutan ba comunidade sira ne'ebé la hetan oportunidade. Xefe suku husu nune'e tanba konsidera autóridade lokál no joven sira mak matan no tilun ba comunidade sira. Iha parte seluk xefe suku mós husu ba JSMP atu continua habelar informasaun hanesan ba comunidade sira iha

área rurais liliu comunidade suku Lauala tanba informasaun sira ne'e importante ba comunidade atu hatene no la'ó tuir bainhira sira hasoru problema.

JSMP observa katak partisipante hotu-hotu iha interese hodi rona no halo diskusaun ho ativa bainhira rona esplikasaun husi fasilitadór sira.

Diseminasaun informasaun ne'e realiza ho apoiu husi projetu Spotlight liuhusi UNDP no União Europeia.

Atu hetan informasaun kompletu, favór kontaktu:

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Telefone: (+670) 33238883 | 77040735

Website: <https://jsmp.tl>

[info@jsmp.tl](mailto:info@jsmp.tl)